



Broj: 03-04-28372-2/23
Sarajevo, 30.06.2023. godine

VLADA KANTONA SARAJEVO
Stručna služba Vlade Kantona Sarajevo

PREDMET: Izjašnjenje na zastupničku inicijativu zastupnika prof. dr. Damira Marjanovića, dostavlja se –

VEZA: Akt Skupštine Kantona Sarajevo, broj: 01-04-24618-30/23 od 30.05.2023. godine

Na Osmoj Radnoj sjednici Skupštine Kantona Sarajevo, održanoj 30.05.2023. godine, u okviru tačke Dnevnog reda "Poslanička/zastupnička pitanja, inicijative i odgovori, zastupnik prof.dr. Damir Marjanović uputio je zastupničku inicijativu, kako slijedi:

"Podnosim inicijativu da nadležna ministarstva, svako u okviru svojih nadležnosti, pripreme (predložje)/usvoje amandmane kojima bi se pooštrile kaznene odredbe Zakona o sigurnosti saobraćaja na putevima u BiH i Zakona o prekršajima protiv javnog reda i mira u KS i drugih relevantnih Zakona, a u smislu uvođenja društveno korisnog rada kao institucije kažnjavanja i ponovne javne edukacije povratnika u kršenju zakonskih odredbi, te klasificiranja velikog prekoračenja brzine u naseljenom mjestu kao naročito drskog ponašanja koje se ogleda u ugrožavanju sigurnosti ostalih učesnika u saobraćaju i pokušaja ubistva.

Obrazloženje:

Usvajanje amandmana je neophodno kako bi zakonska regulativa postala efikasnija u borbi protiv nesavjesnih vozača "trkača" i povratnika u činjenju navedenih prekršaja.

Uvođenje društveno korisnog rada i ponovna edukacija povratnika u kršenju zakonskih odredbi imaju višestruku ulogu. Pored koristi za društvo koju bi imali društveno korisnim radom povratnika u činjenju prekršaja, rasteretio bi se pravosudni sistem, a prekršiooci bi se demotivisali za ponavljanje istih ili sličnih prekršaja. S druge strane ponovnim javnim edukacijama navedena lica bi se također demotivisala od ponavljanja prekršaja, a navedene edukacije bi se mogle vršiti u saradnji sa školama (npr. saobraćajne sekcije i sl) gdje bi učesnici bili predavači. Na taj način bi se kroz edukaciju mlađih naraštaja u školama stvarale nove generacije društveno odgovornih građana. U ponovnu javnu edukaciju bi svakako trebalo uvrstiti i pješake, kao najstarije sudionike u saobraćaju, imajući u vidu da i njihovim nepoštivanjem signalizacije dolazi do nesreća, koje često kao rezultat imaju tjelesne povrede, pa čak i smrtni ishod.

Novom klasifikacijom bi se otvorila mogućnost zapljene vozila kao predmeta izvršenja djela do okončanja postupka.

Mjere trebaju biti usmjerene na prekršioce i povratnike u činjenju prekršaja, te u prevenciju kroz edukaciju. Smatramo da mjere usmjerene linearno prema svim učesnicima u saobraćaju (npr. smanjenje brzine) mogu imati samo negativne efekte.

S tim u vezi, Ministarstvo pravde i uprave Kantona Sarajevo dostavlja sljedeće izjašnjenje:

Nadležnost Ministarstva pravde i uprave Kantona Sarajevo propisana je u članu 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj: 40/22), kako slijedi:

"Ministarstvo pravde i uprave vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti pravosuđa, pravobranilaštva, uprave i lokalne samouprave, poslove upravne inspekcije, poslove davanja mišljenja o usklađenosti zakona i drugih propisa koje donosi Skupština Kantona, Vlada Kantona i rukovodioci kantonalnih organa uprave, sa Evropskom konvencijom o zaštiti ljudskih prava i osnovnih sloboda i drugim instrumentima za zaštitu ljudskih prava, koji imaju pravnu snagu ustavnih odredaba, kao i druge upravne poslove koji ne spadaju u djelokrug drugog organa uprave Kantona."

Shodno citiranoj odredbi i utvrđenim nadležnostima, s ciljem efikasnog djelovanja nadležnih organa i institucija za dobrobit društva i stvaranje boljeg ambijenta u strukturi sigurnosti sa aspekta sigurnosti u saobraćaju, Ministarstvo pravde i uprave Kantona Sarajevo će u skladu sa utvrđenim nadležnostima poduzeti neophodne aktivnosti kako bi se predmetna inicijativa uspješno realizovala.

S poštovanjem,

Dostaviti:

1. Naslovu;
2. a/a.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-083, Fax: + 387 (0) 33 562-241
Web: <http://mpu.ks.gov.ba>, E-mail: mpu@mpu.ks.gov.ba

2/2